



Här Fernand Etgen
President vun der Chamber

Lëtzebuerg, den 19. Juni 2023

Här President,

Esou wéi den Artikel 80 vum Chambersreglement et virgesäit, bieden ech Iech, dës parlamentaresch Fro un den Här Minister fir Educatioun, Kanner a Jugend weiderzeleeden.

„D'Centres d'insertion socio-professionnelle (CISP) fir d'Schüler, déi ee Schouloffbroch riskéieren oder schon ofgebrach hunn, ass eng wichteg Measure, déi d'Verlängerung vun der Schoulpflicht begleet. [...] Aktuell ginn et schon eng Partie CISPen, an et sollen nach anerer a verschiddene Regiounen vum Land geschaf ginn.“ Dëst steet an der aktueller Ausgab vun „EduZoom“ ze liesen, déi virun e puer Deeg vum Educatiounsministère un d'Eltere vu Schüler gemailt ginn ass.

An deem Kontext wéilt ech folgend Froen un den Här Minister fir Educatioun, Kanner a Jugend riichten:

- Wou am Land gëtt et aktuell e Centre d'insertion socio-professionnelle?
- Wéi vill wäerten der gebraucht ginn, wann d'Schoulpflicht bis 18 Joer voll gräift?
- Op wéi enge Plazen am Land sinn der nach geplangt a bis wéini sollen déi operationell sinn?
- Muss nach eng gesetzlech Basis fir d' Centres d'insertion socio-professionnelle geschafe ginn?
 - Wa jo, wat genau muss gesetzlech gereegelt ginn?

Här President, ech bieden Iech, mäin déifste Respekt unzehuelen.

Martine Hansen
Co-Fraktionspresidentin



**Äntwert vum Minister fir Educatioun, Kanner a Jugend, Claude Meisch, op d'parlamentaresch Fro
Nr. 8166 vun der honorabeler Deputéierte Martine Hansen**

Ad 1)

Vun der Schoulrentrée 2023-24 un ginn et féier Centres d'insertion socio-professionnelle:

- de Centre Formida (ARCUS A.s.b.l.) zu Esch-Uelzecht
- de Centre Movidia (ARCUS A.s.b.l.) zu Furen
- d'Jongenheem (SOLINA A.s.b.l.) zu Bartreng an
- de Liewenshaff (Päerd's Atelier A.s.b.l.) zu Mëtscheid.

Ad 2) an 3)

E Centre d'insertion professionnelle (CISP) ka Jonker mat verschiddene Profiller ophuelen. Déi schouflichteg Schüler tëschent 16 an 18 Joer, déi vun deem neie Gesetz iwwert d'Verlängerung vun der Schouflicht betraff sinn, sinn nëmmen een Deel vun der Populatioun. Donieft kënnen esouwuel Schüler tëschent 12 a 16 Joer, wéi och Jonker, déi net méi schouflichteg sinn, opgeholl ginn.

Am Kontext vun der Verlängerung vun der Schouflicht ass d'Betreiung an de Centres d'insertion socio-professionnelle nëmmen eng Mesure ënner aneren, fir Jonker déi ee Schoulofbroch riskéieren oder d'Schoul schon ofgebrach hunn.

Déi geographesch Verdeelung vun de CISPen hänkt esouwuel vun de Kandidaturen of, déi wäerte gestallt ginn, wéi och vun der Lag vun de Partnerlycéeën.

En internen Aarbechtsgrupp am Ministère fir Educatioun, Kanner a Jugend (MENJE) wäert unhand vun dësen Donnéeën en nationale Plang ausschaffen.

Ad 4)

Aktuell ginn d'Aktivitéiten an engem Centre d'insertion socio-professionnelle engersäits duerch d'Lycéesgesetz an andersäits duerch d'groussherzoglecht Règlement vum 17. August 2011 geregelt.

- Am Artikel 9 vum Lycéesgesetz (Loi du 25 juin 2004 portant organisation des lycées) ass virgesinn, dass Schüler ausserhalb vum Lycée, oder an enger Institution spécialisée kënnen beschoult ginn. D'Coursë gi gehal vun Enseignanten aus dem Lycée an d'Schüler bleiwen am Lycée ageschriwwen. De Volet vum Enseignement gëtt vum Lycée organiséiert an assuréiert, sou dass den Träger do net intervenéiert.
- Den non-formalen Volet vum Centre gëtt vun engem Träger assuréiert, mat deem de Ministère eng Konventioun ënnerschreift, an deem een Agreement kritt. Den Agreement gëtt ausgestallt op Basis vum Artikel 2.7. vum *Règlement grand-ducal du 17 août 2011 concernant l'agrément à accorder aux gestionnaires d'activités pour enfants, jeunes adultes et familles en détresse*.

De Gesetzesprojet Nr. 7994 *portant aide, soutien et protection aux mineurs, aux jeunes et aux familles* (...) gesäit am Artikel 17 den Accueil an engem Centre d'insertion socio-professionnelle als eng vun den *Mesures d'accueil de jour* vir, dëst fir Jonker déi am Decrochage scolaire sinn, oder riskéieren ze décrochéieren.

Lëtzebuerg, den 11. Oktober 2023

De Minister fir Educatioun,
Kanner a Jugend

(s.) Claude MEISCH